

COMISIÓN INFORMATIVA DE TRANSPARENCIA E ADMINISTRACIÓN PROVINCIAL

ACTA da mencionada comisión informativa, correspondente ao día **18 de maio de 2022**

Ás 17.00 horas do día 18 de maio de 2022, reúnese a Comisión Informativa de Transparencia e Administración Provincial, no salón de Plenos da Deputación Provincial, coa asistencia dos seguintes deputados e deputadas:

Presidente: D. Plácido Álvarez Dobaño

Deputados/as do Grupo Popular:

D.^a Ana María Villarino Pardo

D.^a Consuelo Vispo Seara

D. Miguel Antonio Cid Álvarez

D. Jorge Pumar Tesouro

Deputados/as do Grupo Socialista:

D.^a Elvira Lama Fernández

D.^a Susana Rodríguez Estévez

D.^a Margarita Pérez Fernández

Deputado de Democracia Ourensana: D. Armando Ojea Bouzo

Deputado do BNG: D. Bernardo Varela López

Deputada non adscrita: D.^a Montserrat Lama Nóvoa.

Secretario: D. Juan Marquina Fuentes

Interventor: José Mosquera Casero

Non asisten dona Rosario Rodríguez Delgado, do Grupo Socialista (substituída por dona Susana Rodríguez Estévez) nin don Aurentino Alonso Araújo, do Grupo Socialista (substituído por dona Margarita Pérez Fernández).

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á ORDINARIA DO DÍA 20 DE ABRIL DE 2022.-

Pola Secretaría Xeral deuse traslado do borrador da acta anterior, correspondente á ordinaria do día 20 de abril de 2022.

Non se producen intervencións e por maioría a comisión adopta o seguinte acordo:

Aprobar a acta da sesión ordinaria da Comisión Informativa de Transparencia e Administración Provincial do día 20 de abril de 2022, conforme co borrador elaborado pola Secretaría Xeral.

2º.- MOCIÓN DO GRUPO SOCIALISTA PARA A LOCALIZACIÓN EN OURENSE DA SEDE DA AXENCIA ESPAÑOLA DE INTELIXENCIA ARTIFICIAL

D.^a Susana Rodríguez Estévez, do Grupo Socialista, expón o contido da moción.

D.^a Montserrat Lama Nóvoa, deputada non adscrita, indica que votará a favor d proposta, xa que é unha iniciativa boa para Ourense e para a súa provincia.

D. Bernardo Varela López, do BNG, manifesta que en principio está de acordo coa proposta, que é algo que o seu partido leva tempo reclamando e que debería acabar co centralismo do Estado. Indica que este sería un pequeno paso para ir na liña de reverter esta situación e descentralizar administracións e institucións.

D. Armando Ojea Bouzo, de DO, manifesta o seu voto favorable. Explica que o seu grupo presentou unha iniciativa política moi similar e que no Pleno profundará na argumentación.

O **presidente da comisión** indica que á marxe da localización concreta desta institución, entenden que veña á provincia de Ourense sería moi positivo, polo que comparte os argumentos xa expostos.

Non se producen máis intervencións e, por unanimidade, a comisión ditamina favorablemente a adopción, por parte do Pleno, do seguinte acordo:

1º.- Instar ao goberno da Xunta de Galicia a que reclame para Ourense a sede da Axencia Estatal de Supervisión da Intelixencia Artificial, con base ao estipulado no Real decreto 209/2022, que establece o procedemento para a determinación das sedes físicas de entidades do sector público estatal, así como a posta en marcha de políticas de descentralización de actividades e infraestruturas da administración autonómica, coa finalidade de fixar poboación e impulsar a economía.

2º.- Instar ao Goberno de España a afondar nas políticas de descentralización de actividades administrativas e infraestruturas públicas, instalando en Ourense a sede de organismos da Administración Xeral do Estado ou das súas entidades adscritas ou dependentes, no marco do reto demográfico, coa finalidade de fixar poboación e impulsar a economía e, nomeadamente,

que unha desas sedes sexa a da Axencia Estatal de Supervisión da Intelixencia Artificial, con base no estipulado no Real decreto 209/2022.

3º.- MOCIÓN DO GRUPO SOCIALISTA SOBRE AXUDAS QUE OS TRANSPORTISTAS RECLAMAN Á DEPUTACIÓN DE OURENSE E SOBRE UN PLAN GLOBAL ANTE A SITUACIÓN PROVOCADA POLA INVASIÓN DE UCRAÍNA

D.^a Elvira Lama Fernández, do Grupo Socialista, expón o contido da moción.

D.^a Montserrat Lama Nóvoa, deputada non adscrita, sinala que, en principio, reserva o voto para o Pleno, xa que a moción conta con innumerables propostas de acordo e que pode haber algunhas coas que si estea de acordo.

D. Bernardo Varela López, do BNG, sinala tamén que se trata dunha moción moi ampla nas súas propostas de acordo, se ben entende que, para remediar a situación denunciada nesta moción, todas as peticións se poderían reducir a dous mandamentos que son, instar ao Goberno Central e á Xunta de Galicia a controlar a especulación nos prezos da enerxía e a controlar a especulación nos prezos das materias primas. Engade que se se conseguise desde o Estado frear esta especulación se evitaría ter que tomar o 90% das medidas que se propoñen na moción. Sinala que seguramente se trate dunha solución complexa, tanto a nivel lexislativo como administrativo, pero que o Estado ten que facerlle fronte a esta situación e acabar coa especulación e non permitir que se socialicen as perdas e se privaticen as ganancias.

D. Armando Ojea Bouzo, de DO, indica que reflexionarán sobre o contido das propostas de acordo da moción e que en todo caso sería moito máis sinxelo pronunciarse se a proposta de acordo se reducise a menos puntos.

O **presidente da comisión** indica que profundarán sobre as iniciativas presentadas e reservan o voto para o Pleno.

D.^a Elvira Lama Fernández, do Grupo Socialista, apunta que a maior parte das situacións denunciadas na moción son consecuencia da guerra de Ucraína e cuxos efectos están afectando ás economías de todos os países do noso entorno.

D. Bernardo Varela López, do BNG, sinala que non se lle debe botar a culpa de todo á invasión de Ucraína, xa que, por exemplo, o prezo da enerxía eléctrica xa estaba disparado antes da invasión. Engade que non nos debemos autoenganar e que existen causas que escapen ao control do Estado e que se trata de especulación pura e dura.

Non se producen máis intervencións e co voto favorable do Grupo Socialista (3) e a abstención do Grupo Popular (5), de DO (1), do BNG (1) e da deputada non adscrita, a comisión ditamina favorablemente a adopción, por parte do Pleno, do seguinte acordo:

1. Instar á Deputación de Ourense a poñer en marcha as seguintes medidas, para facerlle fronte á situación económica e social derivada da invasión de Ucraína:
 - 1.1 Aprobación dun **plan enerxético** dotado con 1 millón de euros, para crear un sistema de axudas equitativas a concellos ourensáns co fin de afrontar os desaxustes económicos que sofren ou sufrirán polo encarecemento de enerxía.
 - 1.2 Creación dunha liña de **axudas directas para o sector do transporte e o sector dos servizos**, co fin de que poida facerlle fronte ao maior gasto causado polo abrupto encarecemento da enerxía, os combustibles e algunhas materias primas, dotado inicialmente con 2 millóns de euros.
 - 1.3 Creación dunha liña de **axudas directas para o sector primario**, que xoga un papel nuclear na economía de Ourense, co fin de que poida facer fronte ao maior gasto causado polo abrupto encarecemento da enerxía, os combustibles e algunhas materias primas, dotado inicialmente con 1 millón de euros.
 - 1.4 Habilitar unha **partida económica que permita actualizar os prezos das obras en execución ou licitación** da propia Deputación ou dos concellos de Ourense, para compensar así a subida global de prezos.
2. Instar á Xunta de Galicia a poñer en marcha as seguintes medidas, para facerlle fronte á situación económica e social derivada da invasión de Ucraína:
 - 2.1 Aprobar un **plan social de axudas** ás familias máis vulnerables, que permita triplicar o financiamento do bono social eléctrico.
 - 2.2 Reformulación da **Tarxeta Básica** para incorporar a persoas refuxiadas.
 - 2.3 Plan autonómico de **axudas directas aos autónomos e profesionais**, co fin de compensar o aumento de custos do transporte.
 - 2.4 Habilitar un **fondo de avais** que garanta a viabilidade de empresas afectadas polo peche de mercados en Rusia e Ucraína. Rebaixa real nas taxas da ITV.
 - 2.5 Impulso lexislativo para determinar, por parte da Xunta de Galicia, os proxectos estratéxicos dirixidos a elevar a **autosuficiencia enerxética**.
 - 2.6 Aprobar a **habilitación legal para que as entidades locais poidan aprobar unha partida co fin de actualizar os prezos das obras** en execución ou

licitación, compensando así a subida de prezos.

2.7 Analizar, xunto cos sectores máis afectados palas consecuencias da invasión de Ucraína (transporte, industrias electrointensivas, pesca, agrogandeiría, turismo...) e, en coordinación coas políticas que para o efecto se impulsen pola Unión Europea e polo Goberno de España, a poñer en marcha aquelas medidas necesarias, no ámbito das súas competencias, coa finalidade de mitigar a situación pola que atravesan os mencionados sectores. En particular, impulsar e executar as medidas incluídas no plan de choque elaborado pola Xunta de Galicia, en concreto:

- A. Activar o **Bono Social Térmico** para axudar aos fogares en situación de vulnerabilidade a afrontar os gastos de calefacción, auga quente e cociña, o do complemento autonómico de 100 euros aprobado no Consello da Xunta.
- B. **Reforzar as medidas activas no plan de aforro enerxético** para as familias, solicitándolle ao goberno fondos para duplicar o impulso do autoconsumo eléctrico e as renovables térmicas nos fogares galegos.
- C. **Ampliar o programa Renove Automoción** para seguir fomentando a compra de vehículos eficientes.
- D. Axudar a pequenas e medianas empresas, cunha **nova liña de avais de IGAPE-SGR** destinada a cubrir as necesidades de liquidez, e a realizar investimentos en elementos produtivos que axuden a facerlle fronte á actual situación.
- E. Desenvolver un programa de **préstamos directos do IGAPE** para a industria manufactureira, así como habilitar os mecanismos necesarios para flexibilizar a devolución dos préstamos e avais directos da Xunta.
- F. **Activar o Bono Enerxía PEME**, dirixido a comercios, hostalería e pequenas e medianas empresas para equipos que reduzan o consumo enerxético.
- G. **Activar o Bono Turístico** como efecto dinamizador do consumo interno e axilizar as axudas para a dixitalización e eficiencia enerxética neste ámbito.
- H. **Inxección extraordinaria para blindar o transporte público** por estrada fronte a subida dos carburantes.
- I. Inxectar **liquidez ao sector gandeiro** pola vía do financiamento de circulante (avais, subsidios de tipo de xuro...) e do anticipo de axudas da PAC.

- J. Crear o **Observatorio da Cadea Alimentaria Galega** como organismo emisor de informes sobre a situación económica dos diferentes ámbitos do sector primario galega.
- K. Crear a **Axencia de Información e Control Alimentario de Galicia** para darlles cumprimento ás abrigas da Lei da cadea alimentaria.
3. Instar ao Goberno de España a adoptar as seguintes medidas, para facerlle fronte á situación económica e social derivada da invasión de Ucraína:
- 3.1 Aprobar, da man da UE, un **cambio na regulación do mercado eléctrico** para toda a península ibérica, que faga posible desvincular o prezo da enerxía eléctrica dos prezos do gas.
- 3.2 Que faga efectivo o compromiso asumido na declaración pactada na Conferencia de Presidentes realizada o domingo 13 de marzo de 2022 e poña en marcha as medidas para minimizar as consecuencias socioeconómicas nas empresas e nos cidadáns tras a invasión de Ucraína e, entre elas, as seguintes:
- 3.2.1 **Baixada dos impostos que gravan a electricidade, o gas, a gasolina e gasóleo. En particular:**
- A. Reducirlles o Imposto Especial aos Hidrocarburos contemplado no artigo 50 da Lei 38/1992 de Impostos Especiais, aos niveis mínimos de imposición aplicables aos carburantes, apuntados no Anexo 1 da Directiva 2003/96/CE do Consello de 2003, de maneira provisional e en tanto persista a excepcional situación de prezos.
- B. Tipo impositivo súper reducido do 4 % do IVE ao gas natural.
- C. Instar á Comisión Europea á modificación da Directiva 2006/112/CE do Consello, relativa ao sistema común do Imposto sobre o Valor Engadido, para que contemple a aplicación dun tipo impositivo reducido aos carburantes de automoción, así como a suspensión dos tipos mínimos do Imposto Especial de Hidrocarburos establecidos na 2003/96/CE do Consello, de maneira provisional e en tanto persista a excepcional situación de prezos.
- D. Estender as medidas fiscais adoptadas polo Goberno para mitigar a escalada da factura eléctrica ata o 31 de decembro de 2022 e incrementar a redución temporal do IVE para que pase do 10 % ao 4 %.

- 3.2.2 **Medidas específicas para os sectores máis afectados** pola situación actual: transporte, industrias electrointensivas, pesca, agrogandeiría e turismo.
- 3.2.3 **Transición enerxética** planificada, proporcional e xusta.
- 3.2.4 **Reverter o incremento xeneralizado de impostos**, especialmente das decenas de impostos que o Goberno central incrementou durante o período 2011-2018 segundo recollen as memorias anuais da Axencia Tributaria, descartando a implantación de peaxes nas autovías que suporían novas cargas para as familias e sectores produtivos esenciais.
- 3.2.5 Impulsar un **plan nacional de produtos estratéxicos** para garantir a subministración de produtos básicos á poboación e no que se priorice a produción no mercado interior.
- 3.2.6 Intensificar a **flexibilización da normativa de contratación pública** vixente, axilizando os procesos.
- 3.2.7 Aplicar unha **cogobernanza real dos fondos de recuperación Next Generation** coas comunidades autónomas e axilizar a súa execución mediante criterios de selección xustos e transparentes, dando prioridade ao impulso de PERTEs.
- 3.2.8 Aplicar as modificacións dos créditos orzamentarios para 2022 que resulten necesarias para **reducir gasto improdutivo**.

4º.- MOCIÓN DO BNG PARA A REACTIVACIÓN URGENTE DA CONSTRUCCIÓN DO CAPD DE OURENSE BAIXO OS TERMOS ACORDADOS POLA PLATAFORMA PROCAPD

D. Bernardo Varela López, do BNG, expón o contido da moción. Indica que na defensa desta moción no Pleno lle cederá a súa quenda de intervención a unha portavoz da asociación, para que a expoña.

D.ª Montserrat Lama Nóvoa, deputada non adscrita, apunta que todos estamos de acordo en que esta obra debe rematarse canto antes, se ben a lentitude na execución das obras non é imputable ao goberno da Xunta de Galicia. Indica que estudará a moción e reserva o voto para o Pleno.

D. Armando Ojea Bouzo, de DO, indica que estamos ante un tema xa tratado no pasado mandato e recentemente no Concello de Ourense. Sinala que parecer ser que unha das razóns da lentitude das obras é precisamente o aumento dos prezos. Anuncia a reserva de voto para o Pleno.

D.^a Margarita Pérez Fernández, do Grupo Socialista, entende que estamos ante unha reivindicación moi xusta e que hai unha falta de vontade da Xunta de Galicia por aumentar as partidas orzamentarias que permitan finalizar a obra. Anuncia o voto favorable.

O **presidente da comisión** fai seus os argumentos da Sra. Lama Nóvoa e do Sr. Ojea Bouzo e indica que, en principio, a súa actitude é positiva ante a moción, reservan o voto para o Pleno.

D. Bernardo Varela López, do BNG, intervén para aclarar que o contrato da obra se formalizou en xuño de 2020 cun prazo de execución de 18 meses e que no momento de suspenderse a execución só estaba executado o 30% da obra. Engade ademais que outro tema relevante é insistir en que se lle dea unha xestión pública a este centro e que non se trata de ningunha ocorrencia, senón que simplemente se trata de pedir o mesmo trato que se dá nas provincias de Lugo, A Coruña ou Pontevedra, onde xa existen centros similares de xestión pública.

Non se producen máis intervencións e co voto favorable do BNG (1) e do Grupo Socialista (3) e a abstención do Grupo Popular (5), de DO (1) e da deputada non adscrita, a comisión ditamina favorablemente a adopción, por parte do Pleno, do seguinte acordo:

1º.- O Pleno provincial insta á Xunta de Galiza á tramitación por vía de urxencia da resolución do actual contrato e da nova adxudicación do CAPD de Ourense, así como concretar o prazo para a apertura.

2º.- O Pleno provincial insta á Xunta de Galiza a concretar os prazos de nova adxudicación da construción do CAPD de Ourense, así como o prazo de finalización, apertura e entrada en funcionamento do centro que deba estar rematado xa en marzo de 2022.

3º.- O Pleno provincial insta á Xunta de Galiza a garantir a participación efectiva da plataforma social no proceso de construción do CAPD de Ourense co fin de que o proxecto se execute consonte coas demandas acordadas.

4º.- O Pleno provincial insta á Xunta de Galiza a explicar de forma transparente as razóns nas demoras na realización das obras de construción e garantir a participación efectiva da plataforma social no proceso de reprogramación da construción do novo CAPD de Ourense.

5º.- O Pleno provincial insta á Xunta de Galiza a que garanta por escrito que o centro público será de xestión exclusivamente pública e directa.

6º.- O Pleno provincial insta á Xunta de Galiza a realizar as modificacións orzamentarias precisas para garantir a súa xestión pública directa a través da contratación de persoal público, dispoñendo os fondos precisos para pór en funcionamento de xeito inmediato o servizo público directo, para o que se consensuará coa plataforma e os axentes sociais a convocatoria urxente dun concurso oposición para a selección inmediata de persoal que garanta a dispoñibilidade de persoal cualificado nada máis rematen as primeiras fases do proxecto.

6º.- MOCIÓN DE URXENCIA.- Trala unánime declaración da urxencia, por unanimidade, tratouse o seguinte asunto:

6ºA.- MOCIÓN DE DEMOCRACIA OURENSANA RELATIVA Á CANDIDATURA DE OURENSE, A CAPITAL DA PROVINCIA, COMO SEDE DA AXENCIA ESPAÑOLA DE SUPERVISIÓN DE INTELIXENCIA ARTIFICIAL

D. Armando Ojea Bouzo, de DO, expón o contido da moción e indica que a urxencia vén dada por apoiar a solicitude de Ourense antes de que se formulen outras posibles localizacións. Ao igual que sucedeu co punto segundo da orde do día, todos os grupos manifestan a súa conformidade.

Non se producen máis intervencións e, por unanimidade, a comisión ditamina favorablemente a adopción, por parte do Pleno, do seguinte acordo:

Apoiar a candidatura da cidade de Ourense como sede da Axencia Española de Supervisión de Intelixencia Artificial.

7º.- ROGOS E PREGUNTAS.- Nesta quenda prodúcense as seguintes intervencións:

O **presidente da comisión** informa que se presentaron por escrito dúas preguntas formuladas, unha por don Bernardo Varela López do BNG e outra por don Aurentino Alonso Araújo do Grupo Socialista, e que debido ao retraso que se está producindo nesta comisión procede a entregarlles un escrito coas respostas aos solicitantes.

E, ás 17.50 horas, dáse por finalizada a reunión, redactándose a presente acta que se asinará electronicamente. Dou fe.

